

UNIVERSITI ISLAM DI KL'83

Bahan asal dari Arkib
Negara Malaysia

KUALA LUMPUR, Ahad — Malaysia akan menjadi tumpuan para sarjana dan pelajar dari seluruh negara Islam bila Universiti Islam Antarabangsa di sini mula mengambil pelajarinya tahun depan.

Buat permulaan, para pelajar tersebut akan ditempatkan di satu bangunan sementara yang mempunyai kelengkapan dan kemudahan pembelajaran sebelum berpindah ke kampus tetap universiti yang akan dibina.

Mengumumkan demikian di Lapangan Terbang Antarabangsa, Kuala Lumpur di Subang sekembalinya dari lawatan ke negara-negara Teluk, petang ini, Perdana Menteri Datuk Seri Dr. Mahathir Mohamad berkata, sebuah jawatankuasa telah pun dibentuk untuk merancang pelaksanaan universiti tersebut.

Buat permulaan jawatankuasa itu dianggotai oleh para pegawai dari Malaysia.

"Bagaimanapun, memandangkan yang universiti itu akan ditadbirkan secara bersama oleh negara-negara Islam, kita akan menjemput mereka menghantar wakil-wakil menganggotai jawatankuasa itu.

"Cadangan menubuhkan universiti itu adalah cadangan baru. Walaupun ia akan dianjurkan oleh Malaysia, ia kepunyaan negara-negara Islam," jelasnya lagi.

Dua bahasa pengantar

Penubuhan Universiti Islam Antarabangsa itu dikemukakan oleh Datuk Seri Dr. Mahathir kepada rakan-rakan sejawatnya dari negara-negara Teluk dan Arab Saudi sewaktu beliau berada di sana.

Datuk Seri Dr. Mahathir yang pada mulanya hanya berhasrat 'merisik-risik' kesediaan negara-negara yang diketujuinya untuk menerima ide penubuhan universiti itu, gembira dengan sambutan dan sokongan yang ditunjukkan oleh rakan-rakan sejawatnya sehingga membolehkan universiti itu memulakan pengambilan pelajarinya tahun depan.

"Cadangan itu amat menarik dan sokongan uniknya begitu baik," ujarnya.

Beliau berkata, universiti itu akan ditadbirkan oleh sebuah badan khas yang akan ditubuhkan tidak lama lagi.

Universiti itu akan menggunakan dua bahasa pengantar, Bahasa Arab dan Inggeris. Bahasa Malaysia pula mungkin digunakan di peringkat pentadbiran.

Tenaga pengajar universiti tersebut pula menurut Perdana Menteri tidak akan terhad kepada orang-orang Islam dari negara-negara Islam.

"Universiti itu akan berlandaskan kepada konsep dan falsafah Islam seperti dalam sejarah zaman agung Islam di mana pusat-pusat pengajian tinggi Islam membukakan pintunya kepada sarjana-sarjana bukan Islam termasuk yang beragama Kristian," jelasnya.



■ PERDANA Menteri, Datuk Seri Dr. Mahathir Mohamad (kanan) berbual dengan Timbalan Perdana Menteri, Datuk Musa Hitam sekembalinya dari lawatan ke negara-negara Teluk di Lapangan Terbang Antarabangsa Kuala Lumpur di Subang, petang semalam. — Gambar Berita Harian.